

# Politicamain, chapis Vos?

## Il dretgs dal pievel er en rumantsch

■ **(anr/ld) Tge è ina «elecziun da maiorz»? Tge vul dir «cumular»? Tge muntada ha ina petiziun? Pudain nus votar electronicamain? Durant in onn da - elecziuns èn talas dumondas zunt actualas. Explicaziuns dat la nova brochura: Politicamain, chapis Vos?** Curtas e cleras respostas sin quellas dumondas chatt'ins en la nova brochura, edida per il giubileum «200 onns chanzlia federala». La brochura en il format d'ina carta postala dilucidescha sin 40 pa-

ginas ils dretgs politics da las burgaisas e dals burgais en la confederaziun. Dad «administraziun federala» fin a «vusch supplementara» explitgescha il cudeschet 50 pleds ils pli impurtants davart ils temas elecziuns e votaziuns. Però betg mo il fatg che nus pudain eger e votar, betg mo ils vasts dretgs politics èn in segn caracteristic da la vita politica en Svizra, mabain er la plurilinguitad. Ella munta ina sfida speziala. L'infurmaziun politica e la discussiun ston adina

puspè surventscher ils cunfins linguistics. Questa brochura po esser utila en quest connex. Ella porscha las expressiuns tecnicas respectivas en tschintg linguas: rumantsch, tudestg, franzos, talian ed englais.

**Las brochuras separadas tenor las linguas pon ins retrair gratuitamain da la secziun infurmaziun e comunicaziun da la chanzlia federala, 3003 Berna. Plinavant pon ins la retrair a chaschun d'ina visita da l'exposiziun «200 onns chanzlia federala» en il Käfigturm a Berna; ella è averta al public fin ils 5 da fanadur 2003.**